

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA IUNI 2021**

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)

**FAAPAIA MALUMALU LONA 4 KOLISI PAPAUTA**



**FAAPAIA MALUMALU EFKS FAI'A'AI**



---

# FAASINO UPU

1. O LE LAUGA	2
2. MALUMALU KOLISI PAPAUTA	4
3. LAUGA FONO TELE-F.LEILUA FT	5
4. LAUGA FONO TELE-PATI VILI FT	5
5. LAUGA FAAU'UGA FAIFEAU	7
6. NA O AFIGA E TULEI MAI FOFOGA	9
7. FAAPAIA MALUMALU EFKS FAIAAI	10
8. MEAALOFI MALUMALU PAPAUTA	11
10. O E UA FAI I LAGI FOLAUGA	14

---

## O LE LAUGA

Tusi Faitau: Kenese 40: 1 - 15

Matua: Kenese 40:8, “*8Ona la tali mai ai lea ia te ia, Ua fai a ma miti, a e leai se na te faamatalaina mai. Ona fai atu ai lea o Iosefa ia te i la'ua, E le o i le Atua ea faamatalaga? Ina tala mai ia ia te a'u.*”

Manatu Autū o le Lauga (TFA 5/7/2021):

### Sailiga mo tagata fai miti (In search for dreamers).

Fai mai le tamaitai tusitala o Gloria Steinem, “Without leaps of imaginations, or dreams, we lose the excitement of possibilities.” A aunoa ma osoosoga o mafauauga, poo miti, ua tatou lafoa'i le matagofie o avanoa gafataulima. “Dreaming, after all, is a form of planning.” O miti, o se matālalaga o fuafuaga faataatitia.

Ae manatua pea le faifeau Papatiso ia Martin Luther King Jr ma lana lauga logologoā, E i ai la'u miti (I have a Dream). O le miti ia soloia le faailoga lanu, le faapologa o tagata uli, ae ia faasoa tatau e tagata uma, le aiā tutusa, le ola saoloto, ola fiafia ma ola saogalemu.

O Isaraelu sa i ai lona igagatō mai le Atua - o tagata fai miti; na faa-meaalofa i ai le potō e faamatala uiga o miti. E talitonu, o miti e fesoota'i mai ai le Atua, e ta'u mai Lona finagalo ma ana fuafuaga. O le faailoga ua valaauina faapitoa e le Atua, e aveva mana auauna e faatino ana fuafuaga, mo le taimi nei, ma ana fuafuaga tuutuu mamao.

Ua aveva ai tagata fai miti, o se gagana faatusa, (symbolic), e faasino ia i latou e saili malo mo le Atua, e osi taulaga ma faasatauro o latou mana'o,

ina ia oo mai Lona malo, ma faia Lona finagalo. Ae tainane foi i latou e saili ia faaecaina aiga, le atunuu ma faiga malo, e ala i tofiga ma nafa ua valaauina ai. O Aperamo, na malaga mamao mai Uro i le itu i sisifo, alu a'e i matu, faasaga i sasa'e toe faaifo i saute; o lana miti, o lana sailiga malo mo se manuia o lona aiga. Fai mai nisi, na alu e saili le mea e oso a'e ai le la mai sasa'e. O lona talitonuga e i ai le Atua e silisili i atua uma, ae na te le'i maua i nuu ma malo na ui mai ai. O'o mai i Karana, o iina na tusi aao i ai le Atua, o le ituaiga tagata tonu lea, le tagata saili malo, le tagata e miti i mea tetele, e fai ma tupuga o lona aiga, lona nuu.

O lana grandson o Iakopo o le fai miti. O le sola'aga a Iakopo, na miti ai i le apefa'i na a'ea'e ma ifoifo ai agelu i Peteli, o le faamautūina o tofi ma faamanuiaga, na folafola muamua i ona augataā. O le miti foi na faailoa ai e le Atua ia Iakopo, togafiti faa'ole'ole a Lapana a o ia auauna ai, ma tapena ai lona toe foi ia Esau. Na sauni Lapana e tuli loa, ae fa'aali ane le Atua i lana miti - 'aua le faalavelave ia Iakopo.

Ae maise lana great grandson ia Iosefa Sopenapaenea; o ana miti, na oo ai Isaraelu i Aikupito, ma tupu a'e ai le aiga e aveva ma nuu, ma malo. Na mafua i miti a le tagata, a o miti na faamaite e le Atua.

I le vaega o le tala ia Iosefa na faitauina, fai mai o ia i le sifi kuka ma le tautū uaina sili a Farao, “*O loo i le Atua le faamatalaga o miti.*” Na tula'i atu Iosefa, faamanino le finagalo o le Atua mo ia auauna e to'alua; e logo lelei i le tasi, na toe faaecaina i lona tofi, ae matuitui i le isi, na faasalaina i le oti; e le'i 'alo Iosefa mai le ta'u atu o le faamasinoga tonu a le Atua, e ala i faai'uga e fai e tagata.

Mulimuli ane fai miti a Farao, na aami Iosefa e faamatala, o le feau mai le Atua, Ia tapena Aikupito mo mala mata'utia. Lea na tofia ai Iosefa, e fai ma Palemia, o le ta'ita'i na lima ta'ita'iina e le Agaga fai mea tonu o le Atua, ma laveaiina ai le malo mai le oge - oge o taumafa, ma le oge i pulega lelei.

Na tofi Saulo e fai ma ulua'i i tupu o Isaraelu, a o se tupu na tete'e i le finagalo o le Atua, tete'e ma sauā i le vasega o ositaulaga a le Atua. Le tupu faasausili manatu faapito, o le nofoalii na o ia, e leai se isi. A o se tupu pala'ai, leai se loto, e lē alofa moni i ona tagata ma lona malo, e lē se Isaraelu fai miti. Na tu mai Koliata, ae maalili ma lafilafi solo. Seanoa Tavita, le fai miti filifilia a le Atua, na ia faatoilalo le fili, i le suafa o le Atua o Isaraelu.

---

Tula'i mai le tupu o Solomona, na fesili i ai le Atua i se mea e mana'o ai, e ala i lana foi miti. Na tali Solomona, ia foa'i mai le loto matala, ia iloa faamasino, ia iloa pule. Na aumai i ai le poto silisili, ma faaponesi mai ai isi mea uma, ona o le miti ua sa'o, ua lelei, ua o gatasi le futia ma le umele, i le finagalo o le Atua.

O Tanielu le fai miti, i aso na sa'e ai le sa o faigamalo a lutaia, taimi o le tafeaga. Na ia faamatala miti, ma le uiga o fa'aaliga vaaia, valoaga pei o le "tusitusiga i luga o le pa puipui", Mene Mene Tekele Uperesa. O le feau mo ta'ita'i faamaualuluga e i ai Nepukanesa, Pelesara, e oo mai nei i Samoa – ua faitaulia e le Atua lou māmāsagia, ua faai'uina e le Atua, ma ua la vaevaeina lau pule, ae foai atu i isi. Samoa le atunuu pele, ua matuā tulaga ese soligatulafono ma amio leaga pulepule solo. I totonu o aiga ma nuu. Ae maise i au faiga malo, ua faatūina ai matātī'a eseese - o matati'a maoa'e e mitamita ai le agaga, ma matati'a o mata o masiasi le inosia. Talofa i auga tamā, le 'au fai miti na latou āsaina le vao filifili o pulega leaga ma sauā, na masa'a lo latou toto ina ia tatou saoloto mai pulega a tagata ese. A o lenei, ua sili atu ona mata'utia le sauā ma le lē alolofa, o le pule a nisi o tatou lava tagata.

O loo saili mai le Atua, o loo tapua'i foi o tatou tua'ā o tofāfā mai ti'asā, mo ni Samoa moni fai miti lelei, latou te lagaina, e faia le faaolataga mo lo tatou atunuu. Nisi e tetelē ma totoa loto, e finau ia toilalo pulega soona fai faamalosi a tagata, pulega ua lē faatemokalasi, ae ua faa-Hitilā. Ni fai miti Samoa e matata'u i le Atua, ae lē fefefe i tagata; e saunoa ma faatino le faamasinoga amiotonu, aunoa ma le popole ne'i faitauina ai.

O ai o fia sailia? Amata ia te a'u, le tagata folafola o le Tala Lelei. Amata foi i la'u lava Ekalesia EFKS. O le upu i le Matapia ma le Manaia, e lē a'oa'ia foi Tamafaigā. Ae manatu o loo saili le Atua, mo ni fai miti EFKS; i Toeaina, Faifeau Samoa ma A'oa'o Malua, A'oa'o Feasoasoani, Tiakono ma Tagata Ekalesia, Faletua ma Tina, e finau mo le Atua ma Lana faigamalo, ia faia Lona finagalo i le lalolagi. O saili se autau EFKS, e sii le taua faaleagaga. Tatou te tago'au i mea tau paia, o auupega faaleagaga. E i ai sulugatiti, ufifatafata ma isi. Ae fia faamamafa le fasi i le pelu a le Agaga, le Tusi Paia, le Upu, le Afioga paia a le Atua.

'Aua le taofiofia le pelu i lona faamoega, ae to mai i fafo e fa'aaogā; 'aua foi le faamatatūpā, auā o le

pelu e sili ona ma'ai. E tau fai ma'ai itu e lua - e ma'ai le Feagaiga Tuai, ma'ai le Feagaiga Fou; e ma'ai upu o tusia pe a faitau ai, e ma'ai foi lona laugaina atu, pe a faalogo ai. O le sulu ma le malamalama. O le Afi ma'ama'ai, e susunu ai otaota o agasala uma.

Ua ogaoga le gasegase o le atunuu, ona o faiga faapolokiki, ua tafili saunoa ai le alii o le lalolagi. Ae maise le faatāsina ai, ma ta'u soo, ta'u fua le suafa pele o le Alii le Atua. E lē tatau ona milia faau'u le manu'a, pei ona tagi Ieremia, "*Ua latou fofō faatauvaa le manu'a o le tama fafine a lo'u nuu, ua faapea ane, E manuia, e manuia; a e leai se manuia.*" Ia taia ma faatoilalo le faaususili, le faamaualuga ma le loto ma'a'a. Ia fasia le amiolētonu, le lē faamaoni, le amio pi'opi'o. Ia tau e ala i ou tofi ma tiute faa-EFKS, i le mea o e galue ai.

E le'i faatafa pe 'alo le Papatiso, i lana sasa ma le sunu'i i le pelu ma'ai o Afioga a le Atua, e a'oa'i ai le au faresaio ma tusiupu, i a latou pulega. Na faaigoa i latou o fanau a gata feai. O fanau a manu (tulou), e fananau ma tupuga mai i lo latou tamā, le gata matua o Satani. E faatusa i ai le mata'utia o le pepelo faafoliga, faagutugutulua, taufaasesē, faa'ole'ole; i latou e fai tulafono ae toe solomua le solipala, ua tuu ai i latou i luga e sili a'e i le tulafono. Ua ua matuā tauaso le ola mata'u i le Atua, ona o le matape'ape'a ma le tu'innanau i le paoa, le mamalu, ma le 'oa. Le vaega faaupufai sauā ma tauemu i perofeta ma ositaulaga a le Atua. Na oo lava i le Upu liutino a le Atua, na latou faasatauro.

Fai mai Ioane, *O loo tu'u nei foi le matau i tafu'e o laau.* E tā i le agaese paia, faatū ai le matau o Afioga a le Atua; o ai le laau e tete'e ma faatalatū, e taia, lafo ma susunu i le afi, e faaumatia ma matuā soloiesea lona igoa, mai le talafaasolopito o tagata. A o le laau e fua mai i le salamō, e faaolaina, e teuteu atili, ma toe fa'aaogā e le Atua mo nisi feau. O sailiga mo tagata fai miti.

E lē gata la i le au folafola o le Tala Lelei, a o loo saili foi i tofiga ma tiute lautele. I le mamalu o ta'ita'i, e oo i le au tautua tuāvae. E lē afaina lava isi ituaiga, a o i latou o itutino, o le Ekalesia Faapotopotoga Kerisiano Samoa. O sui Faipule i soo se vaega faaupufai. I afioga i Faamasino, o Malu o le Malo. O Faauluuluga ma tagata faigaluega, i le Malo, Faalapotopotoga Tuma'oti, ma soo se auunaga. O ē tapua'i ma auuna i le Atua e ala i le EFKS.

(faauma itulau 12)

---

## **FAAPAIA MALUMALU LONA 4 KOLISI PAPAUTA**

---

O le taeao fou i le Talafaasolopito o le Laumua o le Papa, le Kolisi Papauta le Aso Faraile 18 Iuni 2021, ina ua faapaiaina le malumalu fou o le Aulotu i totonu o le laumua. O le Faletua ia Savaliga Asotasi G. Time na lafo i ai le fa'aaloalo na te ootiina le lipine, e tatala aloaia ai le galuega. O le afioga ia Misa Tauiliili le Matuaofaiva sa nafa ma le galuega, na ia tatalaina faitoto'a o le malumalu, seia ulufale atu ai le mamalu o le Ekalesia sa potopoto i lea aso. O le afioga i le Taitaifono Fonotele 2021-2022, susuga Iosefa Atapana Uilelea FT na taitaia le sauniga. O le afioga i le Teutupe a le Ekalesia, Melepone Isara FS na faitauina le Tusi Paia (Iopu 28:12-28), a o le afioga Sui Taitaifono Fono Tele, Tunumoso Iosia FT sa saunia Tatalo. O pese ma viiga o le Atua na saunia e Teine o le Papa, i le taitaiga a le susuga Challis Pupi AM na taina foi le piano. O le Tala o le Galuega sa saunoa i ai le susuga Vavatau Taufao FS le Failautusi Aoa o le Ekalesia. O le faasologa o malumalu i totonu o le Laumua o le Papa, e tusa o lea tala, ma le teuteuina faaopoopo mulimuli mai a nisi o Tama o le Ekalesia, o loo ta'ua ai e faapea:

(i) O le uluai fale tapua'i/falesa na fausi i le 1934, sa ta'ua o le 'Falefa' ona o le gaosia tutusa o ona itu fesaga'i e 4; o le maota atolau na fausia e Anapu ma le aiga salemalama mai Saanapu. Na faapaiaina lea maota i le tausaga 1935.

(ii) O lona lua o malumalu na fausia i le tausaga 1954, o le maota o fai nei ma Maota Taalaelae (Hall) o le Kolisi. O le maota lea na fausia e le afioga Paialii, ae faapaia i aso o le nofoaiga a' le laulau a le TPT-Peresetene o Sunia.

(iii) O lona tolu o malumalu na suia mai ai i luma, i le nofoaga o i ai nei, na faapaiaina i aso 6-7 Aokuso 1980. Na valaaulia le Fono Aoa Tina Samoa, o le Au Uso Fealofani a le Ekalesia Metotisi, Mafutaga Tina Katoliko, Mafutaga Tina Tutuila, sa fai le taalolo ma pese. O le taitai o lea sauniga le afioga Taitaifono Fono Tele, susuga Tuuau Sao FT; a o le Peresetene Metotisi, Faatauvaa Tapua'i sa faia le Lauga. O lona uiga, ua 40+ tausaga le matua o le falesā ua suia nei. Ma e talu ona tula'i mai le susuga i le Failautusi Aoa e ave ma Faatonu o Aoga a le Ekalesia i le 1995, na ia maitauina ai ua faaletonu le malumalu ma ua tatau ona faaleleia/suia. Na tatalo i le Atua mo Lana fesoasoani, mo auala e mafai ai ona faataunuaina lenei faamoemoe, aua tapuaiga i le Atua.

O le Tala o Tupe o le galuega: E tusa ma le faavae, e \$80,000 le tele o le tupe sa mafai ona faataga e le Komiti Tupe e amata ai le galuega. Na faimeaalofa le Mafutaga Tina e \$50,000; ae faamatuu mai e le Fono Tele le \$300,000, maua ai le **\$430,000** ae le'i lava. Na amata le galuega e faafou, peitai na faamaonia e le inisia ua lē aogā le faavae. Ona fai lea le fuafuaga, e faamuamua fale e nonofo ai le fanau a'oga, ma le Tina Pule, ona fa'aauau lea o le malumalu. Ma e uma ane le galuega, o lona tau e \$333,069.25 faaopoopo le tau o le matuaofaiva e \$105,000 maua ai le aofaiga o le tau o le galuega e **\$438,069.25**. Ua ova ai le \$8,069.25 mai le tau na fuafuaina, ae le'i fausia nofoa (\$31,624), laulau o le Faamanatuga (\$3,000), Ea mālūlū (\$8,200) ma isi vaega. Na faalototele mai le Komiti Tupe, ina ia fai pea le galuega, ma faatuatua i le Atua e maua nisi tupe pe a mae'a. Ma e moni lava lea mau, ina ua aulia le aso e faapaiaina ai le malumalu, ua alofagia e le Atua e ala i le aao foi o le Ekalesia na maua ai le \$127,920 (silasila i le Lisi o Meaalofa). Na tauluga le saunoaga a le Failautusi Aoa i le faafetai tele i le Komiti Feau Eseese, le Komiti Tupe ae maise le Laulau o le Fono Tele, mo le taliaina o talosaga ua mafai ai ona taunuu le faamoemoe o le Aulotu ma le Kolisi Papauta. Faafetai i le Aulotu i Papauta, ae maise Ekalesia Aoa mo le nofo tatalo e lagolago i lenei galuega, ae maise le faafetai i le afioga Matuaofaiva ma le Aiga Salemalama.

O le afioga Taitaifono Fono Tele, Iosefa Uilelea FT na saunia le Lauga e matua i le Iopu 28: 28, "*Na fetalai mai foi o ia i le tagata, 'Faauta, o le mata'u i le Alii, o le poto lava lea; o le 'alo ese i le amio leaga, o le mafaufau lea.'*" (Manatu Autu-O le Meaalofa Taugata, ae ua Maua fua). Na faaopoopo i le feau faaleagaga o lea aso, lana faafetai e fai ma sui o le Ekalesia Aoa, i le susuga i le Faifeau ma le Faletua o le Aulotu Papauta, o le Failautusi Aoa foi lea o le Ekalesia, le tamaita'i Pule ia Malua Latu ma le mamalu i le Kolisi, faapea aiga ma Matafale o loo tapuai ai. Na ia faafetaia foi le afioga i le Matuaofaiva ma le Falefa o le Aiga Salemalama mo le galuega matagofie, faapea foi le Komiti o Feau Eseese, Komiti Tupe ma Komiti Aoga, tainane le tapuaiga i susuga Toeaina ma Faletua ma le Ekalesia Aoa, aua o le upu masani, E le sili le ta'i, i lo le tapua'i. Malo galulue, ia viia le Ao o le Ekalesia.

---

## **LAUGA ASO SA FONOTELE 2021**

*(Saunia Faasavala Leilua FT)  
(fa'auau mai le Sulu Me 2021)*

Peitai afai tatou te fai atu ua tatou i ai i le malamalama ae savavali i le pouliuli, o le pepelo lava lea ('Aua tou te ola pepelo faapena). E le tau faailoaina le tele o mea faaletonu, poo le corruption, i soo se tafa o le olaga - i faiga nuu, faiga malo, aiga, galuega, ua pisia ai foi ma le Ekalesia. E pei ona tau fofō nei le faaletonu o le atunuu i lana faiga palota, ma isi mau faaletonu. Ae ala ona i ai faaletonu, ona o le tu'inaanau. *Pe a to le tu'inaanau ona fanau mai ai lea o le agasala; a matua le agasala ona fanaua mai ai lea o le le oti.* E leai se mea e nofo nofo a sesē pe pi'o; e ala ona sesē ma pi'o ona ua faasesē pe faapi'o e le tagata, a le tago fai fua e leai se faaletonu. Ae pau lava lea o le fofō, o le faasusulu i ai o le malamalama, o le soifua ma le ola o Iesu Keriso. Auā e te'a le pouliuli pe a susulu i ai le malamalama. E te'a foi le leaga pe a susulu i ai le lelei, e te'a le pi'opi'o (corruption) pe a susulu i ai le faamaoni.

A o ai e faia? O oe ma a'u, o le Ekalesia. O le finagalo lea o Iesu, na faavae ai lana Ekalesia, ia fai ma malamalama i le lalolagi pogisa. E le faigofie le fesaga'i o le malamalama ma le lalolagi ma le pogisa. Ae le tuua ai, ua matua mana'omia lava le Ekalesia, e le na o i tatou o loo i ai foi ma isi, ona tatou tutū atu ma fa'aali atu le malamalama o Keriso. Ae 'aua le faapu'upu'u i lalo pe tuu i lalo le lamepa, ae tuu i luga. E pei o lo tatou o mai i Malua i lea tausaga ma lea tausaga, o lo tatou o mai e toe fafaga ma utu suau'u o a tatou lamepa ia mu tele pea, ma toe sauni e faasusulu atu i le toe foi i fanua. Ae ala ona le maua ma le susulu le malamalama, ona ua ese mea e faalogologo i ai, sese mea e vaavaai i ai ma matamata i ai, faapea le sese o mea e tagotago i ai.

Lea ua taoto (i le Laulau o le Faamanatuga) le ata o le malamalama ua faasusulu mai e Keriso ma fetalai mai, *'Ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia...*' Ua suia ai le tele o mea ma le tele o ola. Ua faamalamalama ai mea pogisa, ua poto ai le valea, ua faasa'o ai mea pi'opi'o, faalelei le tele o mea leaga ma le ola faapaupau. Ia manuia ma ia soifua ona o Iesu. Amene.

---

## **LAUGA ASO SA FONOTELE 2021**

*(Saunia Pati Vili FT, EFKS Saleaamua)  
(Sauniga Lotu Afiafi, Fale o Tina)*

O le viiga ma le faafetai i le Atua e lē faaitiitia, ona o lenei avanoa faa-auro ma le matagofie ua ou tula'i atu ai ma le gatete i luma o le Ekalesia i lenei afiafi. Talitonu o le vala'auina lava lea e ala i tofiga a lau afioga i le Taitaifono ma le Laulau o le Fono Tele, tainane foi le mamalu o le Laulau a Tamā o le Ekalesia, ua fai ai ma sui o lenei Matagaluega (Lotofaga Lepa Aleipata) e taitai le tapuaiga afiafi o le Fono Tele o lenei tausaga. E mai le ta'ele o le loto, lagona o le faatauvaa ma le mautietie o le agaga fa'afetai tele ona o lenei tofiga.

O le Lauga i le Suafa o le Tamā le Alo ma le Agaga Paia.

Tusi Faitau : Esoto 40:34-38; Efeso 2:17-22

Matua:Eso. 40:38 *"Auā o le ao o le Alii sa i luga lava o le malumalu i le ao, sa i ona luga foi le afi i le po, i luma o le aiga uma o Isaraelu, i la latou malaga uma"*

Manatu Autu:*E fa'aalia pea le mamalu o le Atua i lana Ekalesia.*

Ua a'oa'oina i tatou e uiga i le Atua auai ma mafuta, e lē mamao ese ma ona tagata. E mau faatasi, e lotolotoi i le mea o i ai Lana fanau. E muamua ma taumulimuli i o tatou ala uma. Foliga ia na iloa i ona po o le Esoto. O le fausiaina o Isaraelu e le Atua, o se fa'amoemoe lava na fuafua mamao. O loo taoto i ulua'i tusi a Mose le tapenaga tele a le Atua, e manino lelei le faataotoga o le agai mai o le nuu. E māioio, ma tuumatamaga mea uma, ua la saunia. Ua maua le nuu, ua alu le malaga, fai vavega, tuuina atu le tulafono; ona finagalo lea o le Atua o le a fausia loa se malumalu lea sa ta'ua o le falefetafa'i o le fa'apotopotoga. E fia tapu'e pea ma tapena le nuu filifilia, auā lava sona faavae mautū ina ia mafanafana pea lo la va fesootai. Le Atua e au faatasi, ma mafuta ma ona tagata.

Fai mai le fa'atonuga a le Atua ia Mose (Esoto25), *'Ia e fai atu foi ia Isaraelu, ia latou faia se malumalu mo a'u ina ia ou nofo ai faatasi ma i latou'* Finagalo lava le Atua e iloa e Isaraelu o loo latou malaga faatasi. E lē o se tama'i tapenaga na faatulaga e le Atua mo Mose. Auā na amata mai lava i le atolaau o le feagaiga, oo mai i le faiga o le malumalu, i lona umi, lautele maualuga, o ona foliga

---

ma lona faatotogaina. O se galuega lava ina matuā tele, ae o se fuafuaga foi ua uma ona faataatia lelei e le Atua mo Lana auaua ina ia tino mai ai se taunu'uga matagofie. O le a le fa'amoemoe? Sei faaalua le mamalu o le Atua. O le fale e iloa ai o loo i ai le Atua i le malaga. O le toe palakalafa o le Esoto na tatou faitauina. O lea ua tu le failā. Ua atoa tino o Vaatausili, ua atoa foi tupe i le fafao. Ua faauma ona faia ma faatuina e Mose o le malumalu, po o le fale fetafa'i o le fa'apopotoga. Fai mai ona ufitia loa lea o le fale i le ao, ua tumu foi le fale uma i le pupula o le Alii. Ua afio mai le Atua i le malumalu. Ua fa'aalia foi Lona mamalu silisili ua pupula tele mai mo lona nuu.

E masaga lelei le vaai lea ma le vaai na iloa i le taimi na faaulufaleina ai le malumalu na faia e Solomona. Fai mai o le afi mai le lagi ua mū ai taulaga, ma le pupula o le Alii ua tumu ai le fale uma. E lei mafai e Mose ona ulu i totonu o le fale. E fa'apena foi ia Solomona ma le nuu o Isaraelu ina ua afio mai le Atua i le malumalu. O le fa'aaliga o le mamalu o le Atua, e tumu ai le lalolagi. Po o fea lava e agi i ai fisaga o matagi i le soifua ma lo tatou ola, ua tatou iloa, e afio ai lava le Atua. *Ou te alu ea i fea ai lou Agaga? Ou te sola ea i fea ai ou luma? Pe ou te moe lava i seoli e i ai lava oe' Sala.139*

Na fa'atonu folau lava le mamalu o le Atua i le malaga a Isaraelu. A siitia le ao i luga o le malumalu, ona alu lea o le malaga, afai foi e le siitia, ona le alu lea o le malaga seia oo i le aso e siitia ai. E lei faamamuluina lava e le Atua Lona nuu. Na to'ai lava i Kanana a o pupula pea lona mamalu ia i latou. O upu ua fai ma matua, *'Auā o le ao o le Alii sa i luga lava o le malumalu i le ao, sa i ona luga foi le afi i le po, i luma o le aiga uma o Isaraelu i la latou malaga uma.* Le Atua e mamalu ai le faigamalaga a lana fanau. E ui lava ina faasapasapa i le tele o taimi, e lei tuuna e le Atua. Na mafuta pea ma faimalaga ma a'oa'i. Ua tatou talitonu i le mamalu o le Atua o loo faaalua pea i le malaga a le Ekalesia.. Ui lava i le tele o luitau ma le tele o mea fita mai fafo atu aemaise foi o totonu lava o le lotoifale o le Ekalesia o loo tatou molimauina, ae o lo o ulimasao pea la tatou folauga i le faatasi mai o Lona Agaga.. O le fa'aaliga lena o le mamalu e i ai pea i le au faatuatua. Ua agai mai le tala fa'asolopito, ua tu le malo o Isaraelu, ua mavae atu Saulo ma Tavita ae oo mai Solomona, ma fausia loa le malumalu i Ierusalem, ma avea ai loa ma aai pa'ia, o le afioaga paia lava lena o le Atua. La lea le mitamitaga o le

Isaraelu, o Ierusalem o le Afioaga paia lena o lo latou Atua. Ae ese lava faiga a le Atua, e le oo i ai se mafaufau o se tagata. O mea na tutupu i le tala faasolopito, o loo manino mai ai foi ma le fa'amoemoe paia o le Atua, tainane le faailoaina mai o lona Alofa Tunoa. O le le tasi feagaiga o le nuu o le Atua, na mamulu ese ai lo latou fa'asinomaga. O le tafeaga i Papelonia ma le faatafunaina o le malumalu i Ierusalem, ua fai lava lena ma pine faamau o le toasā tele aemaise le faamasinoga tonu a le Atua, ona o lo latou faatamala ma le le tasi feagaiga. Ae ua fai foi lena ma faitotoa e ulufale mai ai isi mea e sili ma le matagofie ua uma ona tapena e le Atua., auā lona faaali mai i le lalolagi. A faitau i le tasi o Esekielu o loo i ai fa'aaliga na iloa e le perofeta, o loo aumai ai le ata o le Atua ua tuua le malumalu ma afio ese. Na toe iloa foi e Esekielu fa'aaliga o le toe foi mai o le pupula o le Atua. O ia fa'aaliga ua fai ma ata o se fa'amoemoe fou ua saunia e le Atua mo ona tagata.

Ina ua toe foi mai le tafeaga ma toe fausia le malumalu ma toe atia'e le aai, fai mai le au popoto o le mataupu silisili ma le tala faasolopito, ua le toe i ai mamalu sa mua'i i ai i ona po o Solomona. Ua le toe pupula e pei ona sa i ai ao lei faatafunaina. Ai o i tonu a e fanau mai ai le ituaiga mataupu silisili lea na ou fa'alogi ai i se tasi aso. O le tapua'i i lalo o fa'i. Fai mai le lauga a se tasi failauga, faapea lana tala, o ia e ita tele i malumalu ia e fau nei ma fale tetele, ma alu ai tupe e tele, ao tele tagata fia aai; o lona lena talitonuga, ae lagona lava lota faanoanoa, leaga e le o se mea sesē le fausia o malumalu matagofie. Ia, a ita i le taulaga, a ita o le afu sisina i le Tala lelei, o le tautua, o le tuāvae ma le afutoto mo le Atua, o le fale e tapuai faatasi ai le fanau a le Atua. O le fausia o le falesa, o le fa'aailoga o le faatuatua, fa'aailoga o le mamalu o le Atua o loo tumu ai ona tagata, tumu ai le Ekalesia, ma fausia ai mea lelei mo lona viiga. E eseese foi auala a le Atua e fa'aali mai ai lona mamalu ia te i tatou. E ui lava la ina ua foliga o le mafaufauga lea, ua le o toe i ai le mamalu o le Atua i Ierusalem, ae le o tuua e lona mamalu ona tagata faatuatua, le Ekalesia. O le alu ese o le Atua mai le malumalu ma lona toe foi mai, o le fa'aailoga o le le tuuna o le tagata, ua toe foi mai e afio i o tatou loto. Ua le toe malumalu e faia e lima ao loto o le au faatuatua. O le fa'amoemoe foi o le Atua, e mo tagata uma, e mo le lalolagi aoao ae le mo Isaraelu na o ia. Ua siitia e le Atua la tatou vaai ma lo tatou iloa o lona silisili ese, aemaise o auala o lona fa'aali mai mo i tatou.

---



---

Faimai le Aposetolo o Paulo, ua le toe tagata ese se tasi o le aiga foi i tatou o le Atua, ua faavaeina i le au aposetolo ma le au perofeta, ma le maatulimanu o Iesu Keriso. Ua faatatauina ia te ia le fale atoa. O loo alu a'e ai ina ia fai ma malumalu paia i le Alii. O outou foi, ua atiina a'e faatasi outou ia te ia e fai ma afioaga o le Atua i le Agaga. O le finau a le aposetolo i le mataupu o loo fia popoto ai pea Iutaia, na o i latou lava ma le Atua. O le fa'amanatu a Paulo, o le aiga o le Atua, ua tuufaatasia uma ai le lalolagi, e le na o Iutaia, ua le o Ierusalem o le tino a'o le Ierusalem fou o le agaga, e aofia ai nuu uma o e ua faatuatua ma talitonu i lona Afio mai.

Ua fai lava le Ekalesia ma afioaga o le Atua, o loo fa'aalia ai pea lona mamalu ma lona silisiliese aemaise o lona mana. Ua fai le Ekalesia ma malumalu e alu a'e ai le ao ma le afi faaniu tu, o le mamalu o le Atua ao tatou faimalaga i fita ma luitau o le ola. O le fa'amafanafana lena mo tatou. O le Ekalesia o le fa'aaliga lava lea o le mamalu o le Atua e ala i le soifua tatalo, e ala i le molimau atu, le soifua galue faamaoni ma le olaina o le tulafono o le alofa. E toe faasagatonuina ai mea ua le paleni ma fa'aletonu, ona o le le finaua'ia o le tagata. Auā e i ai lava taimi e fia sili ai le tagata ma fia tauvā i le mamalu o le Atua. A oo foi ina faaloloto le tagata, ona lē amanaia lea o le Silisili ese, lē iloa le Atua mafuta ma lona mamalu, ae fai lava mea tatou te loto i ai. E faaalua pea le mamalu o le Atua i lona Ekalesia.

O le vaitau taua lava lena i le malaga a le Ekalesia. Vaitau o le toe matimati, toe fetuunai o muniao, ituaso e faalologo ai i lona fetalai mai, ae nonomanū i le Atua, sei faapupula mai lona malamalama, sei toe faatumu i tatou i lona Agaga, ma faatumau lona mamalu i lona Ekalesia. E lē gata i lena e ese lava le mamalu o lena vaitau. Auā e toe to manatu ai i le tautua lotu ma le soifua faitaulaga o le Ekalesia. E toe to manatu i tua'ā na mua i malae ma asaina fita o le taeao segisegi, ua afe moe ma tofafa i tia, ua masoe i nuuese, a'o lo latou tautiga e tauaao mai le Ekalesia ma fa'aalia ai pea le mamalu o le Atua, seia oo mai i o tatou aso, ona tatou ofo ai lava lea i le alofa o le Atua.

Malo faatoatoa i le paia o le Ekalesia, o tatou matua ua faase'e tuāgalu i le galuega, le fala lē gāe'e o tamā, tainane le maualuga o le Ekalesia i ona tulaga faalupe. Ua numia i tatou i le tele o faafituli ma to'atuga o lena vaitau. E le gata i Samoa nei, a'o nai o tatou tagata o loo atia'e le galuega i atunuu e mamao. Ua

tauau ina tāai faa fala atu ai ma le Atua mamalu ona o le fia mamalu o le tagata. Ua faafia ona lu'i le folauga a le Ekalesia? Se mea māmā ea le tutula'i o tamā o le Ekalesia i luma o faamasino? Ae faapefea tu'ua'iga e lē logo lelei ua palalau mai i le Ekalesia? 'Aua lava tatou te popole, auā o isi na o vaega taua o le vala'auina o i tatou. E atili pupula atu ai foi le mamalu o le Atua e ala i le Ekalesia. E talitonu le agaga o foliga na o le mamalu o le Atua. O ai na iloa pe lē o ala ia o loo fesili mai ai le Atua i le Ekalesia, poo fa'aalia ea lona mamalu i la tatou galuega faa-le Tala lelei?

O le tatalo lava, o le faatuatua, ma le faalagolago i le Alii ma faia lona finagalo, e faaalua ai le mamalu o le Atua o loo siomia i tatou, e folau ai i le filemu ma le to'a malie. O le mamalu foi o le Atua, ua faamamaluina ai i tatou e Keriso. O la Iesu, '*O le mamalu foi ua e foi mai ia te a'u, ua ou foa'i atu ia te i latou, ina ia tasi o i latou faapei o i taua ua tasi.*' Le mamalu na masofa ai le papa tu o le tuugamau, ae to'ilalo popo le oti. Ua faia ai mo i tatou le manumalo o Keriso, ma fa'aalia ai pea le mamalu silisili o le Atua. AMENE.

---

## **LAUGA FAAU'UGA FAIFEAU** **SAMOA, FONO TELE 2021**

(Saunia Faauuga Mata'utia FT, Taitai o le Sauniga)

Tusi Faitau: Iuta 17-25

Matua: Iuta <sup>20</sup>A o outou le au pele e, ia outou ati a'e ia te outou i lo outou faatuatua e silisili ona paia, o le Agaga Paia tou te tatalo ai; <sup>21</sup>ia outou faatumau ia te outou i le alofa o le Atua, ma faatalitali atu i le alofa mutimutivale o lo tatou Alii o Iesu Keriso, e oo atu i le ola faavavau."

Manatu Autu: **VAAIGAILÉ TAFATAFĀ'ILAGI**  
**(LOOKING AT THE HORIZON) IBRA**

E lē tau laugaina outou Faifeau ma Faletua, o Faifeau o le Upu ma le Sakarameta ua faau'uina nei. O ē ua lelei a'oa'oina i le Mataupu Silisili ma Afioaga paia a le Atua. Ua na o se toe fafagu ma se faamanatu mo outou mai le Tusi aupito itiiti o le Tusi Paia; ae lē ave lona itiiti ma ala e ta'u faatauva'aina ai le telē ma le tāua o lona feau. O le Tusi a Iuta le auuina a le Alii. Taoto ia le lavelave o lagona e uiga i le tusitala ma ē o ave i ai le Tusi – po o Iutaia, poo Nuu ese, po o ai lava. A o le mea ua manino, o le Tusi faamalosi ma faamanatu mo tagata Kerisiano, o e

---

talitonu i le Atua ma le Tala Lelei ia Iesu Keriso. Fai mai le fuaiupu 1, *“I e ua valaauina, ua alofaina e le Atua le Tama, ma leoleoina mo Iesu Keriso.”*

Ua feauga lelei foi lea mo outou ua filifilia ma valaauina e le Alii. O loo ta’ua e Iuta i latou o ē fai fili i le Atua, i le uluai vaega o lana Tusi. I latou ua faalagolago ma ola i o latou lava manatu faasausili e tetee atu i le suafa o Iesu Keriso. Fai mai Iuta, <sup>3</sup>*Le au pele e, o loo ou matuā faamalosi e tusi atu ia te outou i le faaolataga ua tu’u tele, ua tatau ai lava ona ou tusi atu ia te outou, e apoapoa’i atu ia outou faamalolosi ona finau mo le faatuatua na tuuina mai faatasi i le au paia.* <sup>4</sup>*Auā ua o ane faalēiloga o isi tagata, ...e faalēmata’u i latou...ma ua latou faafiti i lo tatou Matai e toatasi ma lo tatou Alii, o Iesu Keriso.”* <sup>17</sup>*A o outou le au pele e, ia outou manatua upu na fai mai anamua e le au aposetolo a lo tatou Alii o Iesu Keriso;* <sup>18</sup>*na latou fai atu ia te outou, “E i ai i ona aso e gata ai o tagata tauemu, o e savavali e tusa ma o latou lava tu’inanau ma le faalēmata’u.”* <sup>19</sup>*O tagata lava ia ua latou vavae ese, ua amio faaletino, ua lē i ai le Agaga.”*

Faifeau ma Faletua e, o foliga na o ē o loo auina foi i ai outou e Iesu mo lana galuega Faaola, e liliuina i latou ia foliga ia te Ia. Vaai ē ua vavae ese ia toe opoopo mai, ma ē ua amio faaletino, ia liua i le faaleagaga, ma ē ua lē i ai le Agaga e toe feula ma mānava atu i ai le Agaga o le Alii. O le ala lea o le valaau a Iuta, <sup>20</sup>*A o outou le au pele e, ia outou ati a’e ia te outou i lo outou faatuatua e silisili ona paia, o le Agaga Paia tou te tatalo ai;* <sup>21</sup>*ia outou faatumau ia te outou i le alofa o le Atua, ma faatalitali atu i le alofa mutimutivale o lo tatou Alii o Iesu Keriso, e oo atu i le ola faavavau.”*

Ai lava o piiama Iuta i le lapataiga ma le faamalosi a Iesu i ona foi soo, <sup>16</sup>*Faauta, ou te aau atu ia te outou e faapei o mamoe i le va o luko. O lenei, ia outou atamamai e pei o gata, a ia fifilemū e pei o lupe.”* Mata.10. Le au faau’u, o atu o outou o auauna a Iesu, ia outou sauni e fetaiia’i ma foliga faigatā na o le galuega e lu’ituina ai outou. Ae o oe, ia saunia mo le feau a le Alii, ia ati a’e lou faatuatua i luga o Iesu Keriso lou faavae papa; le faatuatua silisili ona paia pei o la Iuta, ma ia manatua a outou

auupega: *“E lē o le fitafita, e lē o le malosi, a o lo’u Agaga, ua fetalai mai ai le Alii o ‘au.”* Saka.4.

Fai mai Iuta, o le Agaga Paia e tatalo ai. Tatalo! Faamalosi le tatalo, atoa ai ma le pelu a le Agaga – le affoga a le Alii. Vaai au auupega na. Ae soia lou alu ma ave oe, i ou faailoga maoa’e o le potō, e te sau mai le aiga maualuga, e tau tupu lou gafa! O atu ma ave Iesu. E ave faapefea? Ave i lau gagana, lau amio ma lou ola. Fai mai Paulo ia Filipi, <sup>27</sup>*Tau ina ia tusa la outou amio ma le Tala Lelei ia Keriso.”* Fili.1. O lona uiga, ia tusa lau upu ma lau Tala Lelei e a’oa’o atu, ma lau amio. Ae lē mafai pe afai e ‘ela lau vaai ma le tafatafa’ilagi pei o le Autū o le asō – Vaaiga i le Tafatafa’ilagi.

E masani ona tatou vaaia le matagofie o tafatafa’ilagi i le lafoia o le malamalama o le lā i le sami, ae maise i taimi o le lā goto, e vaaia ai i tafatafa’ilagi se vaaiga matagofie ma le manino i aso lagi lelei. A toto’a lau maitau, e te iloa atu i se mea mamao lava, pei ua gata le sami, ae i ai se laina manifinifi, peisea’i ua fesootai ai le lagi ma le suāsami. Afai foi o se vaega eleele lau mamā o loo e tū ai, e nimonimo lau vaai i tafatafa’ilagi, ae e te iloa atu i se mea mamao lava, pei ua gata mai le lalolagi, a o taoto mai ai se laina manifinifi, e foliga o se tua’oi o le lagi ma le laueleele. Mo le Kerisiano, o Iesu Keriso le laina manifinifi lea, ua fesootai ai le lagi ma le lalolagi. O lona Silisili ese, ae maise lona Alofa, ua fai ma tua’oi e sopo atu ai le tagata faatuatua i manuia o le Atua. O Ia o le faitotoa e ui atu ai le tagata agasala e ala i le salamō ma le faatuatua, e tau atu i le Ola Faavavau.

Faifeau ma Faletua, taula’i lau vaai ia Iesu i tafatafa’ilagi, ae lē o le vaai solo i autafa po o fea lava. Taula’i ma tulimata’i tafatafa’ilagi ma lona matagofie. Ia faautauta le vaai, ina ia sagatonu ia Iesu le Alii o le Tala Lelei, e te iloa ai mea lilo ma nenefu. Vaai i lou faatuatua, lou faatuatua fai mai ia ati a’e o le mea silisili ona paia. E lē o se faatuatua mate, a o le faatuatua ola e ala i galuega lelei, ma outou tumau ai i le alofa o le Atua, ma faatalitali ai i le alofa mutimutivale o Iesu Keriso e oo ai i le faamoemoe i le Ola Faavavau. O la tatou feau o loo faamanatu mai e Iuta, <sup>22</sup>*Ia outou alolofa atu i nisi o e ua faaletonu;* <sup>23</sup>*a o isi ia outou faaola ia i latou ma le mata’u, ia se’i ia te i latou mai le*



---

## **NA O AFIGA E TULEI MAI FOFOGA O LE ATUA**

### **Saili le Filemu o le Atua i au faatinoga.**

afi..” O! Afai o i ai ni luko, ia outou faaliliu ia fai ma mamoe. Ae vaai nei e lē mafai ona liliu, ae e liu luko ai. Ia se’i ese ia i latou mai le afi, ae vaai foi nei e lē mafai ona se’i, ae e tofu atu ai ma oe i le afi. Aiseā? Ona e lē o sa’o lau vaai i le tafatafa’ilagi ia Iesu ma Lona mamalu, ona o loo lilifa lau vaai i mea o le olaga nei.

Faaeteete la outou vaai, ne’i pei o le vaai a le ulua’i tagata, ua sesē i le matagofie o le fua o le laau faasāina. Po o le vaai foi a Lota na gata i le matagofie o fanua laugatasi mo ana atina’e, ae galo tagata o i ai e faapaupau. Ae a le vaai a Iuta le Sekara, na gata i tupe ae galo si ona Alii o Iesu?

O la Iesu, <sup>33</sup>*“A ia outou muai saili le Malo o le Atua ma lana amiotonu, ona faaopoopoina atu lea o ia mea uma ia te outou.”* Mata.6. E maua uma lava mea o popole i ai lou loto. Faitalia Lē e ana mea ma Lana faaso. Ae faamuamua le mea o finagalo ai lou Alii. O le a?

Ia ati a’e lou faatuatua silisili ona Paia, tumau i le Alofa o lou Atua, ma faatalitali i le alofa mutimutivale o Iesu Keriso seia oo i le ola faavavau. O la le tusitala Eperu, <sup>1</sup>*“Ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma, <sup>2</sup>ma ia vaavaai atu ia Iesu, o lē na te taitaiina ma lē na te fa’aatoatoaina le faatuatua; o le na onosai i le satauro, na faatauvaa ia te ia le mā, ona o le olioli sa tuu i ona luma, ua nofo foi o Ia i le itu taumatau o le nofoalii o le Atua.”*Eperu 12.

O la tatou folauga faalegaluega, e umi ma fitā. Faifeau e, ma Faletua o le Tala Lelei, e tumu i luitau. O le mea lea, ia taula’i lava lau vaai i lou Alii o Iesu, na te ta’ita’i, faatonu, faasino oe i ala o le galuega. Ae sesē loa lau vaai i mea o le olaga, ona lē tini lea o lau tamo’ega. Tulimata’i Iesu i lau vaai o le faatuatua, o Ia o le malamalama mo le Ekalesia, le Autū o le Fono Tele 2021, o Lē na valaauina outou i lana Tala Lelei. Le Tala Lelei i lana galuega faaola, i lona maliu matagā i le satauro, alu ifo i le tuugamau, ma lona toetu mamalu. Le Tala Lelei lena ua valaauina ai i tatou. Ia manuia outou le Au Faau’u o le 2021. Ona o Iesu, Amene. *(Saunia susuga Fa’auuga Mata’utia FT)*

<sup>12</sup>*“Auā tou te o atu ma le fiafia, e taitaiina foi outou ma le filemu;”* Isa.55. E faailoa mai e le Atua lona finagalo i auala eseese. O se tasi auala o le aumaia lea ia i tatou o le lagona o le ‘manuia’ po o le ‘filemu’ o loo tatou faia le mea sa’o. O tusia e Paulo, <sup>15</sup>*“Ia pule foi le filemu mai ia Keriso i o outou loto.”* Kolo.3. O lona uiga e tatau ona e mulimuli i le ‘tulafono o le filemu’. O loo ia tusi foi, <sup>7</sup>*“O le filemu foi mai le Atua, o loo silisili lava i mea uma e manatu i ai, e leoleoina ai o outou loto atoa ma o outou mafaufau ia Keriso Iesu.”* Fili.4. E te lē manaomia le tele o ni tali ina ia e maua ai le filemu.

O le ta’ita’i’au o Eisenhower sa fetaii ma se tasi o filifiliga aupito faigata ua oo i se tagata: o le suia lea o le aso o le Osofaiga (6 Iuni 1944) - le osofaiga a fitafita a Malo Afaatasi na alu i Europa i le Taua Lona Lua a le Lalolagi - na suia i le minute mulimuli. Pe afai ana sesē lana faaiuga, e oti uma le faitau afe ma afe o fitafita. E maeu le mamafa o le filifiliga! Ae o ia le ofisa e faauluulu i ai le vaega’au, na o ia lava e tatau ona faia le faaiuga. Ina ua toe tomanatunatu i ai, na ia tusia ai faapea, ‘Sa ou iloa e le’i ia te a’u le poto talafeagai, ona ou faasaga a’e lea i le Atua. Na ou fesili ia te Ia ina ia aumai ia te a’u le atamai. Sa ou lafoa’i atoatoa lo’u tagata ia te Ia, ona Ia aumaia lea ia te a’u o le faasinoga manino. Na Ia faasino mai ia te a’u le mafaufau lelei e iloa ai le mea sa’o e tatau ona fai, ma na aumaia le lototele ia te a’u ou te faia ai la’u filifiliga. Ma e mulimuli ane ua Ia aumaia le filemu i lo’u mafaufau ma lo’u loto, ina ua ou iloa, o Lona faasino mai ma taitaiina a’u i le faia o le faaiuga, ou te lafoa’i ai le i’uga ia te Ia’.

O e mafaufau loloto ma lagona le faagaetia, ona ua tuuina atu ia te oe le avega e fai ai se faaiuga i nei aso— se faaiuga e lē gata ina afaina ai oe, ae aafia ai foi ma isi tagata? O le upu mo oe— ia tatalo, talitonu i le Atua mo lana faasinoga, fesili ia te Ia mo le filemu, ona faatino lea o lau faaiuga, ma talitonu ia te Ia e aumaia le faai’uga sa’o ma lelei.

---

## **FAAPAIA MALUMALU FAAFOU EFKS FAIAAI**

O le Aso Faraile 4 Iuni 2021 na faapaiaina ai le malumalu o le EFKS Faiaai, Pulega Salega o le Matagaluega Faasaleleaga, o loo galulue ai le susuga Toeaina ia Faasavala Leilua FT ma le faletua ia Lina. O le faletua o le afioga Taitaifono Fono Tele, Tekimatang I. Uilelea na ia alalua le lipine, e tatala aloaia ai faitoto'a o le malumalu i lea taeao matagofie. O le sauniga na ta'ita'iina e le susuga Leaso Tupa'i FT, o le KMTA Faasaleleaga, Failautusi Komiti Au Toeaina. O le Tusi Paia na faitauina e Epati Sooula FS (EFKS Fagafau), o Tatalo na saunia e Ionatana Tupolo FS (EFKS Vaipu'a), a o le Lauga na saunia e Pulemau Seve FS (EFKS Foailalo). O Pese o le sauniga na usuina e Aufaipese EFKS Faiaai le isi 2 a o le Aufaipese EFKS Fogatuli (la latou falelua) le isi 2. Sa auai uma Tama o le Matagaluega Faasaleleaga faapea ma nisi Toeaina Matagaluega Itu o Tane, le Pulega Salega ma le aufaigaluega faifeau na valaaulia, ae maise le afioga Taitaifono Fono Tele, Iosefa Atapana Uilelea FT ma le Faletua ia Teki.

O le Tala o le Galuega na fofogaina e le susuga Toeaina, Faasavala Leilua FT na tomua i fetalaiga a le Alii, *“O ai foi so outou ua fia fai se 'olo, e le muai nofo i lalo e faitau tupe e totogi a'i, po ua lava ana mea e faauma ai?”* O le mau a le susuga i le Toeaina ua moni lava lenei a'oa'oga a le Alii i la latou galuega i lona taumafaiga mai. Talu ona la taunuu atu i le 1986 na iloa ai le tulaga pagatia sa i ai le malumalu ua tataua ona faalelei. O le tausaga 1988 na fai ai lona le galuega mo le malumalu fou. Peitai e mae'a le galuega ae iloa ai e tele nisi vaega e fia faalelei atili, e pei o faamalama. Na amata mai lena taimi ona toe mafaufau ma sailiili i se auala e maua ai seleni e faataunuu ai le miti mo le faaleleia atili o le malumalu tapua'i. O a latou sailiga tupe faifai pea pei o le Bingo sa maua ai seleni, na faatau ai le tele o 'apa e sui ai 'apa o ato ai le malumalu i le lima tausaga talu ai. Na maitauina e leai sona matagofie i le silasila mai le auala o le atunuu femalaga'i, na ala ai ona faamalosi loa le tataua ona ato ato le malumalu. O le tausaga e 2019 na talosaga ai le Toomaga \$50,000 mai le Ekalesia; o Fepuari na faatau ai 'apa, ae o Iuni na ato ai. Na faasolo mai ai le galuega faafou se'ia aulia le 2021 ua fai le faapaologa ma isi vaega, e oo i le pa o loo si'omia ai le malumalu. O le fesili tele lea sa fai ma silasila i ai - poo lava tupe e fai ai? Faafetai i le Atua i lona fesoasoani mai, e ui ina to'aitiiti, a o lenei ua tau lau o lo latou faamoemoe.

O le tau ato o le galuega e **\$144,289**, aofia ai la latou Toomaga e \$50,000. O loo aofia ai foi nisi o tauofoga ma fesoasoani mai e pei o nei: Aiga o le Toeaina & Faletua na latou fesoasoani faaleleia tioata o faamalama ma le faitoto'a tele i le tau e \$12,000. O le Aoga Aso Sa e \$1,744 lo latou sao, o le asiga mai le EFKS Fogatuli e \$3,000, ma le Tausi Matagaluega Metotisi i Faiaai e \$200. O nisi meaalofo mo le galuega e aofia ai: Tina ia Naomi Fepulea'i Faa'o na saunia le Pulela'a. O le Faifeau ma le Faletua ma o la'ua alo na saunia isi pulelaa laiti. Na ofoina mai e le afioga Taitaifono Fono Tele ma le Faletua le Tusi Paia tele ma le Pese mo le Pulelaa o le Malumalu. O alo ma fanau a Tuisalega ma Temukisa na fai meaalofo e \$5,000. O loo totoe le aitalafu e ala i le Toomaga e tusa ma le \$30,000+. O le afioga i le Matuaofaiva sa nafa ma le galuega, o le susuga Usumanu Su'a, o le A'oa'o Fesoasoani lava o le Ekalesia, ma le Falefa o le Aiga Salemalama o le autufuga lava mai le Aulotu. Na faai'u le saunoaga a le Toeaina i le agaga faafetai i le Atua, ona o ana auala eseese e fesoasoani mai ai ua mamā ma faigofie ai le galuega. *“Aua ne'i ia te i matou, le Alii e..”* O le afioga Taitaifono Fono Tele na saunoa faaleo le agaga faafetai ma le faamalo a le Ekalesia Aoa'o, i le susuga Toeaina ma le Faletua, ma le Ekalesia Faiaai i le afio o Fualau ma le Aiga alii, Fepulea'i ma Usoalii, Tuisalega ma le Pito fanua. Ua i liu o vaa i'a o le faatautaiga. Malo le galulue, faafetai fai taulaga alofa i le Atua. Ua ato tino o le tama, o ata lava o Taulelei le aso ua 'ula. Ae paga lea, o mata o masiasi ua mataoge le Ekalesia, ua lē 'a'u'a'u le faasoa, e tuuina atu ai se meaalofo faatauvaa \$5,000, tau ina faitau ane ai le agaga o le faamalo faafetai a le Ekalesia. O le Atua na te fa'aatoa ma faalava e tusa o lo latou afu sisina i le faatuatua e auauna ma tautua ai le Tala Lelei ia Iesu Keriso.

Na molimau le Taitai o le Sauniga e masani o ia i lenei Aulotu e ala i Felaugaiga a le Matagaluega, e toatele i Tina latou te mafuta i tapuaiga ma to'ona'i. O lona uiga e le o se Aulotu e malosi faatamatane, ae malosi faalefaatuatua, ma le inailau faaleagaga e mafaia ai galuega tetele. Na faai'u le tapuaiga i le Sauniga paia o le Faamanatuga, ona alo ane lea i taumafataga ma fa'aaloaloga maualuluga e masani ai. Ia i le Atua le viiga e faavavau, o Ia ua mafaia ai.

## AUA LE FAAFIAFIA I TAGATA

*“<sup>25</sup>O le fefe i tagata e tupu ai le mailei;”  
Faata.29.*

Ina ia mautinoa le manumālō i le taua, sa tatau ai i le tupu o Saulo ona faatali mo le perofeta o Samuelu se’i sau e osi le taulaga i le Atua. Peitai a o gasolo le vaiaso ma ua lē lava le onosai o le nuu, o lea na osi ai e Saulo le taulaga. Ina ua fesiligia e Samuelu pe aiseā ua na faia ai lea mea sesē, na tali Saulo na ia faia ona ua ta’ape’ape tagata. Fai mai Samuelu, *“<sup>13</sup>Ua e valea i le mea ua e fai na...na fai a faatumauina nei e le Alii o lou malo ia Isaraelu e faavavau...<sup>14</sup>a o lenei, e lē tumau lou malo.” I Samu.13.*

O le mana’o o Saulo e faafiafia i manatu o tagata, na leiloloa ese ai mea uma sa fai mo ia. O le tautala sa’o ma tautala i le upu moni mata e lē faigofie, peitai o loo faatonu mai le Tusi Paia, e tatau ona fai. O le faafiafia i tagata e tupu mai ai le lē faamaoni, auā o loo e fai atu i tagata i mea *latou* te manana’o e fia faalogo i ai, nai lo mea e tatau *ia te oe* ona fai atu ai. E moni e tatau ona e fa’aaloalo ma amanaia lagona o isi tagata, ae lē tatau ona avea lea ma ala e faasesēina ai oe e fai le mea sesē ma le valea i luma o le Atua. E lē avea le musu o le isi tagata e faalogo i le mea moni, e faavaivaia ai oe i lou tiute e tatau ona ta’u atu. E i ai se taimi na e lagona ai lou lē nofo lelei, i se mea na fai atu se isi ia te oe e te faia? O se tasi o auala e taitaiina ai i tatou e le Atua, o le tuuina mai lea o le lagona o le ‘filemu i totonu’. Fai mai Isaia, *“<sup>12</sup>e taitaiina foi outou ma le filemu.’ Isa.55.* Ae o la Paulo, *“<sup>19</sup>Ia tatou tausisi i mea e tupu ai le filemu.” Roma 14.* Pe afai e i ai se mea e te lagona e lē sa’o ma lē amiotonu, ia e tautala, faaleo ma faailoa atu, ‘E leai so’u filemu i lenei mea ua ou iloa.’ O le tele o taimi ma le tele o tagata, latou te lē taliaina lou lagona; e inosia ma itagia ai oe. Ae ‘aua e te popole pe te’i, o le natura lena o le lalolagi agasala ma pogisa. O le a’oa’oga a Iesu i ona soo, *“<sup>14</sup>Ai se lē talia outou, pe lē faalogo ia outou upu, a outou o atu nai lea fale po o lea aai, ia outou tūtū atu le eleele nai o outou vae.” Mata.10.* Pe afai e faamata’u ma tete’e mai se tasi ia te oe, mai lou faia o le mea e te manatu e sa’o ma amiotonu – tau ina lūlū ese pe tūtū ese ia te ia, ae agai pea oe i luma.

\*\*\*\*\*

## MEALOFA MO LE FAAPAIAINA MALUMALU AULOTU PAPAUTA

1. EFKS Piu - Taalolo	\$25,000
2. Matagaluega Faasaleleaga	\$20,000
3. TPT - Tautua Puapuaga Tagata	\$10,000
4. Pulega Melepone Tutotonu, AUS	\$5,000
5. Matagaluega Lotofaga Lepa Aleipata	\$5,000
6. Matagaluega Apia	\$5,000
7. Matagaluega Falealili Safata Siumu	\$5,000
8. Tunumoso Iosia FT & Susana Soliola	\$5,000
9. Komiti Faletua Au Toeaina	\$5,000
10. Mafutaga Aoao Tina	\$5,000
11. Alo & Fanau Tuuau FT & Sina Sao	\$5,000
12. Matagaluega Aana	\$4,000
13. Iosefa Atapana FT & Teki Uilelea	\$3,000
14. Apia Sasa’e (Anoamaa & Fagaloo)	\$3,000
15. Paul Gray FT & Taualogomai	\$2,000
16. Matagaluega Itu o Tane	\$2,000
17. Matagaluega Faleata	\$2,000
18. Matagaluega Vaimauga	\$2,000
29. Ofisa Tutotonu, Tamaligi	\$1,500
20. Asosi TPT	\$1,320
21. Reupena Leau FS, EFKS Piu	\$1,000
22. To’oā Tosi & Aiga Sā Malietoā	\$1,000
23. Misimasefili Tuuau Ieremia Le’autulī	\$1,000
24. Matagaluega Malua	\$1,000
25. Sosaiete Teine Papauta Tuai	\$1,000
26. Pasese Vaauafiao Faamausili	\$1,000
27. Komiti A’oga	\$1,000
28. EFKS Saleimoa	\$1,000
29. Pule A’oga & Kolisi Maluafou	\$1,000
30. Afioaga Matuaofaiva & Au Kamuta	\$1,000
31. Fereti Moenoa FT Penisione	\$500
32. Isaako Viki FT & Pereise	\$500
33. Fina’e Lemusu Taveuni Leau	\$300
34. Mani Nepo FS & Sareta	\$300
35. Luapene Nepo FS & Faaolataga	\$300
36. Uta Muaulu FS & Feula	\$300
37. Rosita Esera - Faatonu Sili Aoga	\$300
38. Faafiafiaga Kolisi Papauta	\$210
39. Eroni Sitanilei FS & Litia	\$200
40. Timoteo Tapelu FS & Ilasa	\$200
41. Mataio & Evelina Ah Siu	\$200
AOFAI	<b>\$129,130</b>

O lenei foa’i atoa ua mae’a ona faarisiti i le Vaega o Tupe i le Ofisa Tutotonu i Tamaligi. Faafetai alofa, faafetai le fai taulaga mo le Atua, e ala i le malumalu o le Aulotu a Tamaitai o le Papa, Papauta. Ia faamanuia ma toe faatutumu atu e le Atua lou mā’au.

---

## O LE LAUGA (mai itulau 3)

E lē tau faailo lou sao faa-le tapuaiga, faalelotu EFKS i sailiga malo a le atunuu. Mai le taunuu o misionare LMS, le sailiga o lou saolotoga faalemalo, ma matati'a eseese a ou agatamā ua lagomau mai ti'asā. O oe lava na e taulamua.

Ua sousou le vasa o la tatou folauga faalemalo i nei aso, ua afatia, ua tauau ina goto lo tatou sa. O loo tatou tau fai saili fofō, saili auala i le Atua, i le tatalo, le anapogi ma soo se auala. O le ala lea o le faaooloma'au, i lau faatofalaiga ma le faautaga, i ou tofi ma lou faatuatuaga faa-EFKS. E faamanatu pea le upu a Moretekai mo Hatesa, *"E iloa foi e ai po ua fai oe ma masiofo ona o se aso faapenei?"* O Iosefa na saofagā i upufai ma faigamalo a Aikupito, ae le'i liua faa-Aikupito ai, pe aveesea ai lona faatuatuaga, i lona Atua ma lana tapuaiga. Sa ia fa'aaogā lelei, o a'oa'oga, a'oa'iga, ma lona faatuatuaga faalelotu, na faafaiilelei a'e ai o ia i totonu o lona aiga, o lona faasinomaga faa-leagaga.

O oe o se tagata fai miti? O le fesili lea na faalogo ai le perofeta, *"O ai ou te auina atu? o ai foi e alu atu mo i matou?"* Afai e te tali pei o Isaia, *"O a'u lenei, ina auina atu a'u"*, ina tula'i mai ia, manū e le'i ui le gasegase o malo, o si o tatou atunuu.

Ua tele le saito e fia seleseleina, o le saito lelei, o agaga fia faaolaina; ua tele foi le saito leaga ua maumau ai le fanua, o agasala fia faamamā, fia sele ese. Ua toaitiiti le au fai galuega, o ē fa'aaogā lelei avanoa, e fa'aaogā ai le ma'ai o le pelu a le Agaga. Ia 'aua le pei i tatou o le 30,000+ toatele na vāea e Kitiona, ae ia avea o nisi o le 300 filifilia, e totoa, loto nuu, loto Ekalesia, e faamoemoe ma faalagolago, e loto tetele i le Alii, ma le malosi o Lona mana.

O Iesu Keriso, le siamupini silisili o le ituaiga tagata fai miti o saili e le Atua. Sa le'i fefe pe solomuli o Ia i soo se tagata leaga, ae alofa mutimutivale i soo se tagata puapuagatia. Na Ia fasia Satani i afioga paia, ma poloaiga a le Atua. Na tula'i o Ia o le lafitaga i matagi, o le malu i afā, i le galu ma le au, o le Tautai i le vasa faigata, ma le ala gaoā. O lana sailiga malo, mo lo tatou ola nei ma le ola atalī, na i'u ai lona soifua mamā i le faatautauina i le satauro. Na tanumia, ae toetū manumalo, o loo soifua pea ma pule aoao e faavavau, faatasi ma le Tama ma le Agaga Paia. E toe afio faalua mai. Ia ia te Ia le viiga e faavavau. Amene.

*Saunia: F Tolia, e sui ai le Lauga na atofaina.*

---

## 'AUALE TUUAITATOU I LUGA O LE FATA FAITAUAGA

*"<sup>23</sup>Na fai ai mo i matou le fata faitaulaga e liliu ese ai." Iosua 22.*

O le fata faitaulaga i le Tusi Paia e tele ona aogā ma ona uiga eseese. E fai ma faailoga o le osiga taulaga i le Atua, e ave ai le mamoe e sili ona lelei mai lau lafu e osi ai le taulaga ia te Ia. E fai foi ma faailoga o le tapua'iga i le Atua, ma tuuina ai o Ia i luga a'e o se isi lava tagata ma soo se mea. E fai ma faailoga o le loto maulalo ma faatauvaa, e ta'utino ai le mana'omia o le Atua ma le ola faalagolago atoatoa ia te Ia. Ae e i ai foi taimi, e mafai ai ona tatou faatuina fata faitaulaga 'mo i tatou'. I le faia ai o lea tulaga, ua tatou faoa ai le Atua ma lona tulaga e tatau ai, i o tatou olaga, ma faamuamua i tatou nai lo Ia. I nisi faaupuga, ua tatou fausia se fata faitaulaga i lo tatou mana'oga, faalauiloina o tatou, faaleleia ma faaeaina o tatou lava.

O le ala lēna na faatulagaina ai e Iesu le fua mo le ave ma soo, ma o se tulaga e maualuga: *"<sup>24</sup>Ai se tasi e fia mulimuli mai ia te a'u, ia faafiti o ia ia te ia, ma ave lona satauro, i le mulimuli mai ia te a'u." Mata.16.* O tatou satauro e tasi lava lona faamoemoe, mo i tatou ina ia maliliu ai i luga. Fai mai Paulo, *"<sup>13</sup>auā afai tou te amio i la le tino, e oti ai outou; a e afai e fasiotia (put to death) e outou amioga a le tino e le Agaga, tou te ola ai." Roma 8.* O tatou tino, i mana'oga ma le natura agasala o le tino, e le faapea e taavalevale ese ma le loto malie ona oti ai lea; leai, e tatau ona tatou tago e faasatauro i lea aso ma lea aso. Ma o le malosi e mafai ai ona fai lēna mea, faato'ā maua ina ua mafuta vavalalata ma lava taimi e fesoota'i ai le Atua e ala i le tatalo, ma ia faafouina pea le mafaufau e ala i Afioaga paia a le Atua. O i tatou e faia le filifiliga i lenei aso; a fia faatuina se fata faitalaga mo le Alii, ia muamua lava ona tuu i ai o tatou 'tagata' i luga o le fata. O le fesili tele, pe mata e mafai, ma ua tatou sauni foi e fai lēna mea?

## O FUAFUAGA LELEI A LE ATUA.

*Jeremia 29: 11, "<sup>11</sup>Auā o a'u nei, ua ou iloa manatu ua ou manatu ai ia te outou, o manatu i le manuia, a e lē o le malaia, o loo fetalai mai ai le Alii, e foaiina atu ia te outou le i'uga e i ai le faamoemoe."*

O taimi o le Tafeaga, e mafai ona faapea, o taimi tonu ia na sa'e ai, ma goto uga le sa, o faigamalo ma

---

upufai o Iuta ma Isaraelu. Ua tafefea ma malelemo ai le nuu filifilia o le Atua. O aso na faatafuna'i ai le aai o Ieruselema, o ona pa ma le malumalu, ae ave faapagota i nuu ese, le tupu ma le malosi uma o le malo. O ituaso o le tagitu'i ma lauaitu, i le tiga matuitui ma le faanoanoa. O lagona o le atuatuvaletu, popole ma le lē mautonu, ua pogisā atoa le lalolagi o le mafaufau ma le loto, ua leai se lumana'i o toe iloa atu. O lagona na faapea ane ai Ieremia, *"E! fia liua lo'u ulu ma suavai, ma o'u mata ma punāloimata, ina ia ou tagi i le ao ma le po, ona o e ua fasiotia o le tama fafine a lo'u nuu."* O le faatusa ia pei o le tatafe malosi o vaitafe e lē pē, le maligi o loimata e lē utu, i le ogaoga o tiga ma mafatiaga o mea ua tutupu. E lē faatapula'a i se ituaso lona tafe, ae faasoloatoa i le ao ma le po. E faapena le lē mapu, lē malolo, o le tagi auēuē, i le vaai atu i le puapuaga.

E lē gata o le tiga o manu'a i le tino, ae sili ona matuitui le tiga i le mafaufau, ma le loto, o le toilalo popo, i lima o tagata faapaupau. Ua oti atoa le faatuatua i le Atua, ua talitonu ua tuulafoa'i ina i latou. E le gata foi i lea, ae mo Ieremia, o le faanoanoa ona o amio faapaupau, ma soligatulafono a o latou ta'ita'i ma ona tagatanuu, ua mafua ai le toasā o le Atua, e pei ona fasia ai i latou.

E manatu i lenei lava vaitau, o lagona faapea o loo tutulu ai itu e fia o le lalolagi, ona o le faama'i o le Koviti-19. I le vaai atu i le maliu fasia o le faitau miliona, faitau afe ma selau, o le fanau a tagata i itu e fia o le lalolagi, i lea aso ma lea aso. A o se lagona foi lea i le maitau atu i upufai a si o tatou atunuu o Samoa. E tagi'ū'ū le fatu, ma maligi loimata, i le vaai ma faalogo ma le faanoanoa, i le gasologa o upufai ma aafiaga o polokiki.

O lenei le lagona ua tatou masani ai, pe a oo mai le oti e motusia ai le mafutaga ma e pele ia i tatou - o itutino o le aiga, o falefaigaluega ma faalapotopotoga tatou te auai, ae maise itutino o Aulotu ma Ekalesia. O lagona o le tiga ma le faanoanoa, ona o mafutaga motusia i le oti. O lenei le ituaso, e sili ona ogaoga lona matuitui i le soifuaga o le tagata, le ituaso e fesaga'i ai ma le oti, e leai se tasi e fia malosi, pe na te teena. E auē, e tagitu'i; e maligi ma tafe loimata i le ao ma le po. Atonu foi e leai se loimata e vaai i le tino, a o totonu i le mafaufau ma le loto, e matuā nutimomoia ona o lē sa pele i loto, sa mafanafana ma aogā mo i tatou, i le soifuaga o aso taitasi. Ua se tafeaga faaIsaraelu tīgā o le loto ma le mafaufau.

E faapefea ona mātū loimata o le faanoanoa? Mo Isaraelu, na tusi atu le perofeta o Ieremia mai Ieruselema, ia i latou o i le nuu o Papelonía, ma ta'u atu i ai le fuafuaga (le plan) a le Atua mo i latou, *"Ua ou iloa manatu ua ou manatu ai ia te outou, o manatu i le manuia, a e lē o le malaia, o loo fetalai mai ai le Alii, e foaiina atu ia te outou le i'uga e i ai le faamoemoe."*

E tele vaega o le tusi, ae fia ootoo nai itu nei, e tusa o le fautuaga a le perofeta, o le finagalo foi lea o le Atua:

Muamua, Ia talia e le aiga o Sa Iutā, le mea ua latou oo nei i ai. E le'i tupu fua le tafeaga. Ae o le taui lea o lo latou fouvale ma faifili i le Atua. Ia latou talia le a'oa'iga. E ui ina o le to'asā o le Atua, a o loo lotolotoi ai ma lona alofa silisiliese. *"Aua o lona to'asa ua se emo o le mata lea, a o lona alofa tunoa o le ola lava lea; e afe ane le tagi i le afiāfi, a o le alaga fiafia i le taeao."* Sala.30:5. O le oti, o le faasologa o le soifuaga, ia tatou talia ma le faatuatua, fuafuaga a le Atua. E ui ina tiga, ae o loo ogatotonu ai lona alofa. Fai mai Ieremia, ia fai fale, fai aiga, nonofo lelei ma ati a'e le nuu o i ai, e manuia ai foi ma i latou. Ioe, atia'e pea le faatuatua, a o tatou i ai i totonu o lenei olaga, o loo tatou tiga faatasi ma Ia. O lona lua o fautuaga a Ieremia, ia 'aia le talia a'oa'oga sesē a perofeta pepelo. Fai mai i latou ia, e na o le 2 tausaga o le tafeaga, ona toe foi lea i Ieruselema. Leai, 'aia le faalogo i ai. O taimi o le maliu ma le oti, e tele faaososoga a le fili e fetuleni mai, e faasesē ai lo tatou faatuatua i le Atua, ia faasaga ese o tatou mata faaleagaga mai ia Iesu Keriso lo tatou Alii. E ala ai le fefe, popole ma atuatuvaletu. Faafofoga pea i lona fetalai mai, *"Aua le atuatuvaletu o outou loto...ou te lē tuua outou o matuaoti, ou te sau ia te outou. Ia outou o mai ia te a'u, outou uma o e tigaina ma mafatia i avega, o a'u foi e malolo ai outou."*

O lona tolu, A atoa le 70 tausaga, ona toe asiasi mai lea o le Atua. E i ai le uiga loloto faaTusi Paia o le numera 70, e pei foi o isi fuanimera. E faasino i le faavasegaina, o le faatulagaina maopoopo lelei ona atoatoa faaleagaga o se mea (perfect spiritual order), e faatinoina i le pule ma le malosi uma lava. Pei o le 70 o le fonu a toaina na tofia e Mose, ma le 70 na ia aveina a'e i Sinai, e fesaga'i ma le Atua, ma isi faaitaiga e tele. O fuafuaga a le Atua mo ona tagata faatuatua, i aso faigata ma faanoanoa, o fuafuaga e atoatoa ona maopoopo, auā e faavae i Lona alofa.

---

# **O E U A F A I L A G I F O L A U G A**

---

## **ANAPU MATIU AIALII ANAPU**

**(26/9/1943 - 12/5/2021) 77+7+17**

*“Ia e tau le taua lelei i la le faatuatua, tago atu ia i le ola e faavavau, na valaauina ai foi oe, ma ua e ta’utino atu i le ta’utinoga lelei i luma o molimau e toatele.” 1 Timo.6:12.*

O le Tiakono a le EFKS Saanapu-tai ma Saanapu-uta, Matagaluega Falealili Safata Siumu. Na tofia o ia e avea ma Tiakono Toeaina o le Matagaluega i le 2001-2006. Na soifua mai i le Aso Sa, 26 Setema 1943. O ona tua’ā o Anapu Solofa Anapu ma Alaitupu Asiata Lagolago Anapu (ua maliliu). Sa faaipoipo atu ia Tavaimanuuli Karapani i le aso 28 Tesema 1968 e le susuga ia Posa Te’o FT sa galulue i Vaigaga, Faleata. E to’a 12 le fanau, ma o nisi o la’ua alo o loo fai ma avefeau o le Tala Lelei, e pei o (i) Latania Anapu & Rev. Setu Setu o galulue Metotisi Hawaii, (ii) Fofogapapa Anapu & Rev Maligi Setefano i le EFKS Niu Sila, (iii) Fa’ao Anapu & Rev Nouata Saifoloi, EFKS Vailoa-uta Faleata, (iv) Alaitaufafo Anapu & Rev Tupe Ioelu i le Metotisi Ausetalia.

Na tofia i le suafa Anapu i le 1964, ma e tuumalo ua 57 tausaga o lana nofoaiga. Sa galue o se Faamasino Samoa i le Faamasinoga o Fanua ma Suafa, ma o le tausaga 1994 na tofia ai e avea ma Sui Peresetene. Ma malolo litaea ni le aso 6 Novema 2011 ina ua ausia le 41 tausaga o lana tautua i le Malo Samoa. Na tuumalo Anapu i le Aso Lulu, 12 Me 2021 a o usuia le Fono Tele i Malua, ma o se tamā ua tele tausaga o feagai ma gasegase. Ae ui lava i ia gasegase, ae sa galue lava ma finau ma le loto tele i le faatinoina o lona valaauina i le Malo, le Ekalesia, ae maise i totonu o lona aiga ma le nuu.

Sa ou ta’ita’i i lona sauniga i le Fale Maliu o Ligaliga i le Aso Sa, 23 Me 2021, ma molimoli atu ai lona tino maliu i le Malumalu o le EFKS Saanapu-uta ma faia ai lona Sauniga Faale’aiga, na ta’ita’iina e le susuga Denny Epati FS. Na molimau ai lana fanau ma aiga i Samoa, faapea foi le fanau ma aiga o aitau malele i atunuu mamao e ala i fesootaiga faatekonolosi faaonaponei o le ZOOM.

Na mae’a lona sauniga faale’aiga, ona toe momoli lea o lona sa i lona aiga i Pousigano e mapu ai, mo leoleoga o le po ma sauniga Leo e faamafanafanaina ai le aiga faanoanoa, e tusa o le tu ma aga masani a le Ekalesia. O le Aso Gafua 24 Me, sa faia ai ona Toe Sauniga, sa auai le Matagaluega Falealili Safata Siumu. O le susuga Toeaina ia Kereta Fuafiva FT sa ta’ita’i, o Siaso Moananu FS (Tafitoala) sa faaulufale le sa o Anapu i totonu o le malumalu, o Lance Ulale FS (Saaga) na saunia Tatalo, a o Tuia Peseta FS (Siumu) na saunia le Lauga. O le faletua ia Tavaimanuuli sa saunia le molimau i la latou mafutaga ma le tamā ia Anapu, faapea le susuga Tafafuna’i Aialii (alo o Anapu) sa fai ma sui o le fanau. O le molimau a le aiga o Anapu na saunia e le afioga Seve Te’i Fuimaono Mimio, a o le afioga Mulitalo Penaia sa fai ma sui o le afioaga.

O lona molimau faaleagaga na saunia e ana feagaiga o Denny Epati FS ma Iakina Alefaio FS. O Anapu o se toa e loto i le tausiga o le nuu, ae maise le galuega a le Atua; o se tamā e pele ia te ia le galuega a le Atua i totonu o lona nuu. E ui lava o ia o le Sa’o o le nuu, ma e tataua ona mata uma ia te ia fa’aalologa ma mea lelei uma o le nuu, ae na saunua lava Anapu ma ia faailoa i aiga uma o le nuu, ia ave le faamuamua i ana Faifeau i soo se mea e fai i le nuu. O se tagata e finau malos i le faatumauina o le tulafono i totonu o Saanapu, ina ia tasi le Ekalesia e faataga i totonu o le nuu, ua na o le EFKS. Ma e maliu nei Anapu, o loo tausisia pea lea tulafono e Saanapu e oo mai nei. O se aso e mamalu tele i ona Toe Sauniga, aua sa faatasi uma i ai le Itumalo Safata i le leoina o lona maota i le po na tofa ai lona tino maliu i lona aiga. Talofa ua maliliu toa o le atunuu, na latou sailimalo mo se manuia o aiga ma ana tupulaga, o le afioaga ma le itumalo, ae maise le Ekalesia EFKS. Ua ia manumalo i le taua lelei. O loo lagomau i lona maota i Pousigano, sa matou faatofa atu ia te ia i le Pese masani a le EFKS, “Talofa uso e, tofaina oe”. Ia manuia tele lau malaga Anapu. Tofa, tofa.

*Saunia: Iakina Alefaio FS, EFKS Saanapu tai  
FALEALILI SAFATA SIUMU*



# O E UA FAI I LAGI FOLAUGA

## AFEMATA TUNUMAFONO

### APELU FRUEAN AIAVAO

(25/8/1930 - 1/6/2021) 90+9+8

E malii le afioga Afemata Tunumafono Apelu Aiavao, o ia umia tofi Tiakono ma A'oa'o Fesoasoani, sa galue ma tautua ai, i le EFKS Apia ma le EFKS Sataoa. Ma e malii o ia ua 90 tausaga 9 masina ma 8 aso o lona soifua, i le Maota Gasegase i Motootua. Na faia lona Sauniga Faaleaiga i le malumalu EFKS Apia, i le Aso Lua 15 Iuni i le 3pm. Sa taitai lea sauniga e le susuga Apelu Jr Lelevaga FS (o tausia le galuega), fesoasoani i ai le susuga ia Saaga Kofe AM. O le Aso Tofi 17 Iuni na aveeseina ai lona tino malii mai le Fale Malii o Ligaliga i Malifa i le 3pm. Na molimoli atu i lona aiga i Taueselemanu i Sataoa Safata, ma faia ai le sauniga lotu puupuu, na taitai e le susuga Faresa Faresa FS (EFKS Sataoa) faatasi ma A'oa'o Fesoasoani ia Seve Samuelu AF ma Seve Nifo AF. O le Manatu Autu o lea afiafi (TFA) "E le mafai ona fesiligia".

O le malama o le taeao o le Aso Tofi 18 Iuni na faataunuu ai lona Toe Sauniga i le malumalu EFKS Sataoa. O se uluai toe sauniga faalemalo (state funeral) lea ua faia i lea malumalu ma lea afioaga. Na taitai lava le susuga Faresa Faresa FS, faaulufale atu le malii e Mafi Faamoe FS Penisione (EFKS Fusi Safotulafai) o se taulaga soifua a le afioaga o Sataoa, ae sa tauaveina le sa o le susuga i le A'oa'o Fesoasoani, e Malu o le Malo. O le faitauina o le Tusi Paia na fofogaina e Rev. Peter Brown, Tausi Matagaluega Metotisi Faleagai Sataoa. O tatalo na saunia e Pastor Onē (AOG Sataoa), a o le lauga na saunia lava e le taitai o le sauniga. O le manatu autu e tusa o le faasinoga a le TFA, "O le meaalofa tauigatā, ae maua fua (An expensive but free gift).

O molimau o le afioga Afemata Tunumafono Apelu Aiavao: (i) Tuilaepa Sailele Malielegaoi (Malo), (ii) Susuga Falemalu Aiavao FS Penisione (Aiga), (iii) Tunumafono Ulafala Rihara Apelu Fruean Aiavao (atalii), (iv) Olie Lagimaina Aiavao Seiulialii Sawez Viliamu (afafine), (v) Afioga Afemata Palusalue Faapo 2 (Aiga Potopoto/Nuu) (vi) Susuga Utufua Naseri FT Penisione, (vii) Susuga Faresa Faresa FS (Soifua Faaleagaga/Ekalesia). O le sauniga faalemalo na tauaaoina ai le tagavai o le malo Samoa i le susuga Falemalu Aiavao FS, e aloaia ai le tautua a le afioga Afeamata Apelu, na saunoa ai le afioga Hon. Afamasaga Rico Tupa'i, Minisita Tausi o Fesootaiga, ma ia tau'a'aoina atu ai le tagavai. Sa auai foi le afioga Sui Fono Sui Tofia, Tuiletufuga Le Mamea Ropati ma lana masiofo. O le afioga ia Afemata Tunumafono

Apelu, o le tamalii tusitala lauiloa o le atunuu, i ana tusi e pei o le 'Maunu mai Loimata o Apaula' (1987), 'E vaetuli le fale Samoa a o le faasinomaga' (2004), 'Turtlemen of Leusoalii' (1964), 'O le mama apamemea ma isi tala' (1971) ma isi e tele. Sa usufono i le Fono Tele, ma avea ma sui o le Matagaluega Apia i le Komiti o Aoga. O se tasi o ana matati'a, le avea o ia ma ulua'i Faatonu Sulu Samoa, e lē o se Faifeau, na avea ma Faatonu Sulu Samoa i tausaga 2007 - 2018.

E tupuga mai o ia i tua'ā Amerika Siamani Isaraelu, a o matua e mai Sataoa, Leusoalii, Lalomanu ma Gataivai; o lona tamā o Tunumafono Apelu Aiavao Segā (1909-1981) a o le tina o Mea'atoa Lei'a. O ia le ulumatua o le fanau toa 12, ua maliliu le to'a 10. Sa faaipoipo muamua ia Erena Nuku, ona toe faaipoipo lea ia Fulisiailagitele Fagalele Violet Pita Uo (malii 4/7/2016). E to'a 6 le fanau, ae 62 i latou na tutupu mai ai. O se talaaga oototo o lona soifua:

1953 - o le uluai Head Boy i le Kolisi o Samoa.

1953 - o le uluai Samoa na pasi le School Cert.

1960 - Faiaoga, Kolisi o Samoa

1961 - Failautusi a le Misisita o Fale Meli. Faatonu o Polokalame ma Faasalalauaga mo A'oga.

1968 - Aoga Maua aluga a Palauli.

1970-1979 - Faatonu, Education Publication, Mtg A'oga. 1974 - Na faasuafa Matai ai ia Tunumafono.

1979-2000 - Ofisa Sili mo Faamatalaga, Ofisa Taulogologo i le Palemia, Faatonu o le Savali.

1990 - Na faaeina ai le tofi A'oa'o Fesoasoani.

1996 - Na faasuafaina ai le suafa Afemata i Sataoa

1998 - Ritaea mai le malo. Fai le faleoloa i Aleisa.

2006 - Ritaea mai tiute faa-lotoifale (private sector)

2007 - Tofia e Faatonu o le Sulu Samoa, EFKS.

2017 - Faailoga Tauloa o Tautua, a le Ao o le Malo.

2018 - Faamavae mai le Faatonu, Sulu Samoa.

2019 - 2020 Fai ana tusitusiga i lona maota.

2021 - Gasegase ma malii i le Falema'i Motootua.

O loo lagomau Tunumafono Afemata Apelu Aiavao i lona aiga i Taueselemanu i Sataoa, Safata. O le sauniga faai'u i le tuugamau na ta'ita'iina lava e le susuga Faresa Faresa FS, ma faatofa atu ai i le Pese Faamavae a le Au Kerisiano, "Talofa uso e, tofaina oe, Ua sau le itupo e malolo". Na faaiu le aso i fa'aaloga masani na saunia e le mamalu o aiga. "Aue! Ua maliliu toa ua mau mau ai auupega o le taua." Manuia lau malaga Afemata.

*Saunia: Susuga Faresa Faresa FS*

*EFKS Sataoa, Pulega Siumu ma Safata*

*Matagaluega FALEALILI SAFATA SIUMU*

---

# O E UA FAI LAGILE FOLAUGA



*Anapu Matiu Aialii Anapu*

## FAIFEAU FAAU'U 2021



*Laina i tua: Steven Palala, Tau Toleafoa, Panapa Jr. Latasi, Charlie Banse, Vaegatootoo Magele, Melepone Isara, Elekana Lealiifano, Panapa Alafau, Kuresa Tavalani.*

*Laina i luma: Meleseleisa Palala, Leinatioletuitoga Toleafoa, Fesu'ea'i Latasi, Malaē Banse, Tupe Isara, Fiailoa Lealiifano, Tema Alafau, Easter Tavalani (Aniva V. Magele e le'i auai).*